

Badische Landesbibliothek Karlsruhe

Digitale Sammlung der Badischen Landesbibliothek Karlsruhe

Trostspiegel in Glück und Unglück

Petrarca, Francesco

Franckfurt am Mayn, 1620

Cap. CXXI - Cap. [CXXII]

[urn:nbn:de:bsz:31-390377](https://nbn-resolving.org/urn:nbn:de:bsz:31-390377)



Frewd.

Ich hoffe noch alles Guts/ Gesundheit/
lang Leben/ gute Tage/ Friede/ auff Erden
Frewd vnd Lust/ vnd endtlich in gutem Al-
ter seliglich zusterben.

Vernunfft.

Warlich du hoffest viel/ das Glück wirdt dich
in vielen kriegen. Wer viel hoffet/ wirdt offi betro-
gen/ Wer wenig hofft/ laufft dem Glück einen
ranck ab.

Wer lang Leben verhoffet/ vergisset das er ster-
ben muß/ vnd weiß nit das er so lang mit schmerz-
gen in dem Kercker vnd Gefängniß des Leibs/ viel
muß gedulden/ Vnd ob du dir schon ein kleine zeit
ein müßlin machest/ kommet doch lange Reutwe-
hernach. Deines Leibs wirst du nicht Meister seyn
können/ er wirdt dir ein Lust anrichten/ dein Gut
wirdt dir zur Bürde vnd Beschwernuß seyn/
wirdt hie vnd dort stecken vnd anstoßen/ muß also
im Meer mit Gefahr schiffen/ dich an die Winde
hengen vnd fallen. Vnd wann du schon etwas ge-
winnest/ so muß du Sorg genug auch darzu ha-
ben/ vnd ein Gewinnlin wirdt dich in vnzählliche
vnglück setzen/ man wirdt dich triegen/ so gescheid
würdest du nicht seyn können.

Ich habe dir oben herab erzehlet/ wie dein schöne/
reichthumb/ gewalt/ hoffnung vnd anders/ so gar
nicht solle noch werdt seyn/ sihe auff dich/ du wirst
in vielen betrogen/ dein Gewalt wirdt dir zum
Neid gerathen/ Dein Reichthumb zur Armut/
Dein Hoffart zur Forcht/ dein Regiment zur
Angst vnd Noth/ zu einem vnseiligen Leben/ Dein
Ehr zur vnnützen Frewd vnd Schande/ Dein
Weib vnd Kinder zu täglicher Sorge/ Deines
Sohns Frau wirdt dir zur Pein seyn. In Mühe
vnd arbeit muß alles dein fürnehmen schließen.
Stirbt dir ein altes Weib/ so wirst du ein neuen
Strick haben müssen/ der dich binden vnd gürten
wirdt. Nimbst du dir zu studiren für/ so hast schon
ein Ambos/ Hammer vnd Eisen/ damit du dir
ein geräusche machest/ dir dein Schlaf darmit
zu vertreiben vnd verderben. Hoffest du Frewd
nach deinem Tode/ so würdest als ein Lauber
Nachtgallen singen nicht hören mögen/ vnd was
man dir nachthun mag zu ehren/ geschiet dir als
einem blinden/ der nichts mehr sihet. Dein Nam
wirdt auch in vergeß gestellt/ Niemand wirdt dein
gedencken. Dein Gut werden deine Freunde von
deiner armen Seel wegen verzehren/ vñ bitten das
du ja nimmer widerkomst oder lebendig werdest.

Von verhofftem Friede des Gemüts.

C A P. CXXI.

Pacem animi veram nemo quam tu melius dat.

Wilt haben Fried im Herzen dein/
Der selb allein bey dir mag seyn.

Affectus prauos linque, quietus eris.

Treib auß von dir all böß Gelüß/
So bist zum Frieden wol gerüß.

Frewd.



Freud.

Ich hoffe ein gut Gewissen/ Ruh vnd Fried des Gemüths zukommen.

Vernunft.

Ich höre wol du wilt lieber Fried des Gemüths hoffen dann haben. Friede deines Gemüths magst du wol haben/ so du anfahest fromb zu werden/ vnd in Gott glauben. Friede hoffen/ gehört Kriegsleuten zu? Wer füget aber deinem Gemüt mehr Krieges zu dann du? Wilt du von andern haben/ das du dir selbs nimmest/ was darffte es viel hoffens/ das du dir selbs geben kanst/ vnd dir niemand nehmen mag dann du? Laß Zorn/ Neid vnd allerley Begierde/ so fahest du an rühig in deinem Herzen zu werden/ warumb thust du an dir selbs so vbel? Die Leuthe fleissen sich mehr ihres verderbens dann heilens.

Mann kauffet thewerer den Krieg des Gemüths/ dann den Fried vñ Ruhe des Leibs. So gehet es auff Erden zu/ das so viel Menschen/ so viel böser Neigligkeit/ vnd jeder andern widerwertig/ daher so viel Vnruhe/ Kriege vnd Haders in der

Welte/ so viel Begierde/ Hoffens vnd Harrens ist/ Vnd wann man schon das verhoffte bekommet/ so ist ihm dannoch noch nicht recht/ hebet man erst an gaffen vnd gumen/ vnd muß der morgengig Tage besser seyn/ dan der heutig/ das künfftig angenehmer/ dann das gegenwertige.

Man findet Leute die lieber die Hoffnung des zukünfftigen haben wollen/ dann die Sache an ihr selbs die sie hoffen/ geben die Hoffnung nicht vmb das verhoffte/ was soll ich solchen Leuten wünschlen/ dann das alle ihr ding vbermörmig seyn soll/ sich gegenwertiges alles berauben/ vnd zwischen vergebenen Hoffnungen alte Narren werden/ Ob sie in ihrem Alter verständig möchten werden/ wie vnnützlich vnd eitel ihr Hoffen sey/ vnd zu rück sehen/ das sie gehoffet haben/ das sie zuvor bey ihnen gehabt haben. Was soll ich sagen? Hoffen vnd Harren macht lauter Narren/ Ist ein Dunst/ Rauch vnd loser Nebel/ alles was Menschen hoffen/ Träume vnd vnnützes wesen. Wie viel steigen mit solcher Hoffnung des Friedens zu ewiger Arbeit/ Kriege vnd Mühe.

Von Hoffnung des Lebens.

C A P. XXII.

Est verus scopus aeternam sperare salutem,
Das ist die Hoffnung ganz vnd gar/
Mit der du bald gehn Himmel fahr.

Si spes illa suis iuncta sororibus est.
Doch lug das Glaub vnd Lieb da sey/
Die wohnen rechter Hoffnung bey.

Freud.



Srewd.

Ich hoffe von Gott zu bekommen die ewige Seligkeit/darzu vns Gott allen helffe.

Vernunfft.

Also heist dich Gott reden/diese Hoffnung ist recht vnnnd selig/ aber sihe das dir ernst sey/ Die Weisen sagen: wer ein Tugent rechtschaffen bekommen habe/ der hab sie alle/ Also hast du rechtschaffene Hoffnung zu Gott/so hast du alles/ alle Tugent vnd ewiges Leben/ Liebe vnnnd Glauben. Wo diß mangelt/ so were es kein rechte Hoffnüg/ sondern ein vermessenheit. Derhalben sihe/das du ihm recht thust/ dann man findet die guts vbel handlen/Gott sihet zu/ eben als wol/ wie ein ding geschehe/ als was geschehe. Er fordert Rechnung

von einem jeden vnnügen/ vberflüssigen vnd müßigen Wort oder Handel.

Nicht allein die Himlische/ sondern auch die Irdischen Herren/ haben lieb das man von ihn hoffet/ besonderlich von denen die sie lieben/ ob sie wol etwan sich an ihnen vergriffen hetten/ verhoffen wider zu Gnaden zukommen/ vnd zuflucht zu der Barmherzigkeit zuhaben. Derhalben wer zu jenem Leben wil/ muß diß zeitlich bessern/ vnd endlich lassen/ vnnnd rechtschaffene Hoffnung haben/ nach Gnad/ Barmherzigkeit vnd ewigem Leben trachten. Selig vnd aber selig bist du/ so

dich hie dein Hoffnung nicht betriegen wirdt.

Ende des ersten Buchs Francisci Petrarches/
Von Rath in gutem Glück.

Das